

AWIG - AWIG
DESA ADAT BUWIT



KECAMATAN KEDIRI, KABUPATEN
TABANAN - BALI
2002

**“OM ANO BHADRAH
KRATAWO YANTU WISWATAH”**

(Dumogi Sami Sane Becik-becik Rawuh Saking Saider Bhuwana)

ATUR PAKELING

Om Suwastyastu

Malarapan Paswecan Ida Sanghyang Widi Wasa, Krama Desa Adat Buwit, prasida ngamijilang Awig-awig Desa Adat Buwit, sane gumana pacang mawosang indik tata cara Sukerta Desa lan Pawongania.

Awig-awig mula wantah pawakan sendi, miwah sesaka, maka pamikukuh Desa adate. Kengin momot manahe ngaturang awig-awig puniki, dumadak sida kaanggen sesuluh antuk prajuru lan krama desa, rikala nyangra miwah midabdabin Desa Adat Buwit puniki.

Sapunika taler suksmaning idep katur ring para sujana sane sareng mawosin daging awig-awig puniki, gumanti prasida mangge maka pamutus, saantukan kepariangken pisan Desa adate kasinanggeh paguyuban sang maagma Hindu, malarapan antuk cihna pamekas Desa adate tan maren kajengkepin antuk :

- a. Kayangan maka panyiwian
- b. Dharma prawertinia nyanggra kasukertan sanghyang agama pamekas ipun manut dresta.

Asapunika atur pakeling titiang, menawi wenten kekurangan daging atur, titiang nunas sinampura.

Om Santih, Santih, Santih, Om

Buwit, 11 Agustus 2002

Bendesa Adat Buwit

MURDHA - CITTA

Om Suastyastu Om Awighnamastu nama siddham

Malarapan saking pengyangning Ida Sang Hyang Widhi Wasa asung kerta nugraha ngawentenang kahuripan sekala niskala, ring Bhuwana Agung lan Bhuwana Alit. Manut dresta Desane wantah Kamanggehang Bhuwana Agung, pawongannya soang-soang pinaka Bhuwana Alit. Sotaning Bhuwana Agung Desane wantah pawakan Bhuwana maurip jangkep saha Tri Hita Karananya luire :

ha. Parhyangan, sahananing kahyangan, penyiwian desa genah ngarcana

Ida Hyang Parama Wisesa maka jiwaan desane;

na. Pawongan, krama saha warga desa maka sami mapawakan Bayu

Pramana mawidan desane sida molah maprawerti;

ca. Palemahan, tanah kakuwuban desa sinanggeh stulaning desane.

Adung petemon bhuwana kalih, larapan santa - Jagadhita, sinanggeh murdhaning prayojana pangeriptaning awig-awig Desa Pakraman ring paseban sami krama desa adat.

Pinaka sepat siku-siku pemuutus, wastu prasida, prayojanan mami kabeh prasama angidep muah amagehaken kadi linging awig-awig iki.

DAGING AWIG-AWIG

ATUR PEKELING	i
MURDHA CITTA	ii
DAGING AWIG-AWIG	iii
I PRATAMA SARGAH, ARAN LAN MEWIDANGAN DESA	1
II DWITYA SARGAH, PATITIS LAN PAMIKUKUH	2
III TRITYA SARGAH, SUKERTA TATA PAKRAMAN	3
1. Indik Krama	3
2. Prajuru Lan Dulun Desa	6
3. Indik Kulkul	9
4. Indik Paruman	10
5. Indik Druwen Desa	12
6. Indik Sukerta Pamitegep	14
1. Karang Lan Tegal	14
2. Pepayonan	15
3. Wewangunan	16
4. Wewalungan	17
5. Bhaya	18
6. Penyanggran Banjar	19

IV CATHURTAS SARGAH, SUKERTA TATA AGAMA	20
1. Indik Dewa Yadnya	20
2. Indik Rsi Yadnya	24
3. Indik Pitra Yadnya	25
4. Indik Setra/Tunon	29
5. Indik Manusa Yadnya	31
6. Indik Bhuta Yadnya	32
V PANCAMA SARGAH, SUKERTA TATA PAWONGAN	34
1. Indik Pawiwahan	34
2. Indik Nyapian	36
3. Indik Sentana	38
4. Indik Warisan	40
5. Indik Sima Krama Suka-Duka	43
VI SAT SARGAH, WACANA LAN PAMIDANDITA	44
1. Wicara	44
2. Pamidandita	45
VII SAPTAMA SARGAH, NGUWATI-NGUWUHIN AWIG-AWIG	48
VIII ASTAMA SARGAH, SAMAPTA	49
IX PAMIKUKUHI	50

PRATAMA SARGAH
ARAN LAN WEWEDINGAN DESA

Pawos 1

- (1) Desa Adat puniki mewasta Desa : Adat Buwit
- (2) Jebar kakuwuh wewidangnya mewates nyatur :
 - ha. Sisih wetan/kangin Desa Adat Kaba-Kaba
 - na. Sisih kulon/kauh Desa Adat Pandak Gede
 - ca. Sisih lor/kaja Desa Adat Mundeh
 - ra. Sisih kidul/kelod Desa Adat Beraban
- (3) Desa puniki kewangun antuk karang Desa utawi gebogan krama turmaning
kepah dados enam bebanjaran utawi sinanggah tempekan luire :
 - ha. Banjar Adat Kelakahan Kaja
 - na. Banjar Adat Kelakahan Gede
 - ca. Banjar Adat Delod Sema
 - ra. Banjar Adat Buwit Kaja
 - ka. Banjar Adat Buwit Tengah
 - da. Banjar Adat Mertasari

DWITYA SARGAH
PATITIS LAN PAMIKUKUH

Pawos 2

Desa Adat Buwit ngamanggehang pamikukuh minakadi :

- ha. Pancasila;
- na. Undang-Undang Dasar 1945;
- ca. Tri Hita Karana manut Sadacara Agama Hindu.

Pawos 3

Buwit patitis Desa Adat Buwit

- ha. Ngukuhang miwah ngerajegang Agama Hindu;
- na. Nginggilang tata prawertine magama;
- ca. Ngerajegang kasukertan desa saha Pawongannya sekala lan niskala.

TRITYA SARGAH
SUKERTA TATA PAKRAMAN

Palet 1

Indik Krama

Pawos 4

- (1) Sane kebawos Krama desa inggih punika keluarga sane meagama, Hindu, saha ngemong karang utawi jumenek ring wewidangan Desa Adat Buwit;
- (2) Sajaba punika sinanggeh tamiyu, sane kabinayang dados kalih inggih punika sane meagama Hindu, miwah sewosan ring meagama Hindu.

Pawos 5

Krama Desa Adat wenten 3 (tigang) soroh :

1. Krama ngarep, kulawarga sane wed utawi pengrawuh saking warga desa sewosan saha ajeg pawiwahanya.
2. Krama tan ngarep, luire :
 - na. Silih sinunggil kulawarga sane tan ngarep ring Desa sakewenten ring banjar kanton ngarep,
 - na. Krama penyade, inggih punika krama sane sampun lepas ayah kagentos antuk sentananya, utawi krama sane ngentos ayah krama ngarep wiyadin tan ngarep sane sampun dados warga sekaa truna ring Banjar .
 - ca. Krama pangele (ngempi) krama sane nenten ngemong karang, kewannten jenek ring Desa Adat Buwit.

3. Krama balu, kula warga ngarep utawi tan ngarep silih sinunggil lanang utawi istrine lina, wiadin nyapian;

Krama balu inucap kabinayang dados :

ha. Balu mekrambian, inggih punika balu sane maduwe sentana dereng merabian.

na. Balu ngelisting, inggih punika balu sane tan pasentana.

Pawos 6

1. Ngawit dados Krama Desa :

ha. Wit sangkaning wed ring desa Adat Buwit

✓ na. 6 sasih mawiwit pawiwahan

2. Panemaya tedun makrama desa manut dresta, maduluran antuk materag.

Pawos 7

Tetegenan miwah swadarma Krama Desa Adat

(1) Tetegenan Krama luire :

ha. Krama ngarep, keni urunan miwah ayahan mamungkul,

na. Krama balu, keni ayahan manut kawonganya :

1. Balu ngelisting, lanang utawi istri keni ayahan lanang utawi istri kewenten.

2. Balu makrambian, lanang utawi istri sampun madruwe sentana penyade keni ayahan memungkul.

ca. Krama pengele, keni ayah-ayahan ngeromba krama ngarep.

(2) Krama Desa Adat kadadosang

la. Mapuankid utawi tan tedun ngayah nganut pirarem Banjar
soang-soang luire :

1. Ritatkala sungkan;
2. Matepetin anak sungkan raat;
3. Madruwe kalayu sekaran;
4. Sedek wenten ring dura desa (nganut pirarem)
5. Ritatkala nangun yadya nganut pirarem.

na. Nyade mapiteges lepas ngayah, risampun tan mradidayang mekarya.

ca. Mogpog ngetut wiadin nutug ayah saha papeson antuk brana, manut
pirarem, majeng ring krama Desa sane magenah ring dura Desa adat.

ra. Penyeledihi nyade wiadin nyuksukin ayah risampun mayusa
17 (pitulas) warsa.

Pawos 8

Kapatutan krama tamiyu :

ha. Krama tamiyu patut madana punia ring desa adat/banjar manut
pirarem.

na. Krama tamiyu patut polih petias marupa pitulung sejeroning katiben
pancabaya, saha tinut ring awig-awig desa adat.

Pawos 9

(1) Wusan dados krama Desa, luire :

ha. Sangkaning pinunas ngaraga, menawi kesah ke dura desa,

na. Kenorayang, duaning sampun tan prasida ngesehin solah maprewerti
setata mamurug kecaping awig-awig.

ca. Wusan makrama desa mapiteges taler wusan makrama banjar utawi
wusan makrama banjar mapiteges taler wusan mekrama desa mangda
sampunang kasinanggeh empak ngelanting.

(2) Sang wusan mekrama :

ha. Tan polih pahpahan druwen desa nanging ring Banjar manut pirarem
Banjar.

na. Tan polih pesayuban sajeroning ala ayu.

Palet 2

Prajuru Lan Dulun Desa (Penglingsir)

Pawos 10

(1) Desa Adat Buwit kaenter antuk Banjar Adat.

(2) Banjar kaenter antuk Klian Banjar Adat

(3) Bendesa Adat patut :

ha. Mawiwit saking krama ngarep;

na. Keadegang melarapan antuk pemilihan olih Krama Desa Adat nyabran
5 warsa tur dados kepilih malih, wantah 2 (kalih) masa jabatan.

ca. Prajuru tiosan kemedalin olih Banjar soang-soang
ra. Maduluran pinung ring Pura Desa

Pawos 11

(1) Bendesa Adat kesangra antuk :

ha. Petajuh utawi pangliman pinaka wakilnia;
na. Penyarikan pinaka juru surat;
ca. Petengen pinaka pengemong druwen Desa;
ra. Kasinoman/penyeketan pinaka juru arah akeh nia manut
kawigunan ya.

(2) Sajeroning ngenterang sukerta niskala Bendesa Adat mingsinggihang
pemangku Kahyangan Desa.

(3) Prajuru ngadegang Penglingsir Dulu Pemucuk sinanggeh Dharma desa,
sane mewiwit prajuru lepas, sang wikan ring adat agama; adiri sinanggeh
✓ panua kasarengin juru surat saking penyarikan desa.

(4) Prajuru ngadegang sabha Desa pinaka panureksa pidabdab desa adat manut
perarem.

(5) Prajuru ngadegang pecalang Desa.

Pawos 12

(1) Swadarmaning Bendesa Adat luire :

ha. Ngemargiang sedaging awig-awig miwah perarem desa;

na. Nuntun tur ngenterang krama rawuhing warga desa ngupadi anut patitis;

ca. Mawosin kalih niwakang pemutus marep ring wicara warga desa;

ra. Maka duta matemuang bawos ring sapa sira ugi.

(2) Prade Prajuru desa dulu iwang penglaksana keni pamidanda manut perarem

Pawos 13

Petias utawi olih-olihan Prajuru adat :

ha. Luput rerampen (pepeson); ring Khayangan Tiga rikala piodalan;

na. Polih Petias saking urunan krama Desa Adat nganut perarem;

ca. Petias sewosan manut perarem.

Pawos 14

(1) Prajuru/Dulu Desa kagentosin riantukan :

ha. Lina;

na. Kewusang dwaning iwang pemargi menawi nilar sesana;

ca. Wit saking pekayun utawi pinunas ngaraga.

(2) Ngenorayang, ngewusang miwah utawi ngentosin Prajuru/Dulu Desa patut ring sejeroning paruman tur keingupin entuk Krama Desa.

Palet 3

Indik Kulkul

Pawos 15

(1) Kulkul ring desa luire :

- ha. Kulkul Desa;
- na. Kulkul Banjar;
- ca. Kulkul Sekaa-sekaa.

(2) Tabuh tetepakan kulkul Desa

- ha. Atuladan tambat, tetengaran tedun ngayak;
- na. Atuladan bulus, tetengaran kepancabhayan;

(3) Tengeran Kulkul ring soang-soang bebanjaran :

- ha. Kalih tulud bulus, tetengaran ngerorod (pengantenan).
- na. Kulkul kelayu sekaran (lina) dabdab ping solas.
- ca. Kulkul sangkep/ngayah megegineman.
- ra. Kulkul kepancabhayan atuladan bulus.

Pawos 16

(1) Kulkul Desa utawi Banjar tan wenang ketepak yening tan sangkaning pituduh Prajuru Desa utawi Kelian Banjar sejawaning tengeran kepancabhayan.

(2) Sang nepak kulkul tan sangkaning pituduh Prajuru Desa/Banjar patut digelis atur supeksa maka buatan penepake, yan kabuatane nenten patut, patut sang mamurug kedanda manut pirarem.

- (3) Kulkul Sekaa-sekaa, semalih kulkul pondokan tan kelugra nyawerin (matehin) sukat utawi tengeran kulkul Desa/Banjar, prade mamurug taler kedanda manut perarem.

Palet 4

Indik Paruman

Pawos 17

- (1) Paruman/sangkep ring Desa Adat Buwit kawentenang manut wiguna majalaran arah-arahan.
- ha. Sangkepan Prajuru Dulun Desa, kawentenang manut wiguna.
- na. Paruman sekaa-sekaa manut kabuatan.
- (2) Paruman Desa utawi Banjar madudonan sekadi ring sor :
- ha. Prasida lumaksana risampun ketedunin antuk sang patut ngamiletin kemaggala antuk tenggeran kulkul miwah mabusana adat manut dresta saha tan kelugra makta gegawan, sakaluire, tan marengarcana ring Ida Bhagawan penyarikan saha widi widana miwah cane;
- na. Tan kalugra ngemedalang baos gora utawi byota mamurug keni panidanda pecamil kadi dandaning nguman-uman ring paruman;
- ca. Pamutus bebawos beriuk sepanggul (hingkup) pinaka kemanggehang.
- (3) Prade daging paruman tan kecumpunin, mangda Prajuru Desa/Banjar ngilikang bawos, saha putusannya mangda kararem antuk Krama Desa/Banjar malih prade tan kasungkemin jantos ping tiga juru Desa/Banjar dados nunas bawos ring Sabha Desa manut dudonan luire :

kemanggala paingkupan prajuru, ngeraris panglingsir, panguntat paruman malih.

Pawos 18

- (1) Sajeroning paruman Desa, Bendesa adat patut nyiarang pemargin ngenterang desa, pemekas ngeninin indik :
 ha. Munjuk lungsuring pekraman saha ayah-ayah, sulur arta brana, druwen Desa;
 na. Pidabdab Prajuru ngeninin usaha desa kapungkur.
- (2) Pamutus paruman desa sinanggeh perarem, maka pamitegep pamargin awig-awig.

Pawos 19

- (1) Sangkepan Prajuru Desa ngawedarang rerincikan usaha desa kapungkur.
- (2) Sangkepan Prajuru/Dulun Desa tan dados ngemedalang tetegenan ring krama sedereng keingkupin antuk Krama Desa.
- (3) Pamutus sangkepan Prajuru/Dulun Desa ngewetuang paswara, maka pidaging pituduh sang ngawewenang utawi ngonekang pecak perarem Krama Desa.

Palet 5**Indik Druwen Desa****Pawos 20**

(1) Padruwen Desa Adat Buwit sekadi ring sor :

ha. Khayangan Desa luire :

1. Kahyangan Tiga

- Pura Puseh
- Pura Desa
- Pura Dalem Buwit lan Kelakahan

2. Kahyangan Druwen Desa :

- Pura Beji Kepel
- Pura Rare Angon
- Pura Melanting

na. Tanah Tegalan Tigang cutak :

- Dauh Setra Agung Buwit
- Ring Ajeng Pura Penataran

ca. Setra-setra :

- Setra Buwit
- Setra Kelakahan
- Setra Bebajangan

ra. Pelaba Pura carik 5 cutak :

- Sema Buung
- Uma Belodan

- Uma Buwit 2 cutak
- Uma Babakan

ka. Lelanguan, minakadi tetabuhan lan ilen-ilen padruwen desa/banjar

luire :

1. Ilen-ilen Wali Pura Rejang Pendet.
2. Lekita-lekita, luire pipil krama, awig-awig, pasuara/perarem lan sane tiosan.
3. Pelawatan Ida Batara lan Ratu Ayu Ring Pura Dalem Buwit.

da. Nyasa, sasanthi

ta. Lembaga Perkreditan Desa (LPD)

(2) Olih-olihan Desa Adat Buwit luire :

- ha. Urunan Krama Desa Adat;
- na. Paica saking Guru Wisesa;
- ca. Danapunia tiosan, sane patut tur lan ngiket;
- ra. Saking LPD Desa Adat Buwit;
- ka. Saking Pelaba Pura.

Pawos 21

(1) Prajuru Desa patut ngetangang pamupon pura lan sepenunggalan druwe Desa.

(2) Pikolih lan pamupunya keanggen prebeya piodalan saha wewangunan ring pura miwah anggen perbuatan desa adat.

- (3) Ring sangkepan Desa, Prajuru pengemong druwe desa ngewentenang parindikan munjuk lungsuring praduwen desa ring krama desa.
- (4) Sakaluring druwe desa patut wenten ilikitanya.
- (5) Tan kalugra ngadol utawi ngesahang praduwen Desa yan tan kasungkemin antuk Krama Desa.

Paillet 6

Sukerta Pamitegep

Kaping 1

Karang lan Tegal

Pawos 22

- (1) Krama Desa Pengemong karang desa (tanah sane tan keni tigasana) patut ngewatesin karang inucap antuk pagehan/turus tembok mangda pekantenannya asri.
- (2) Wates sisi kaler miwah kangin patut kekaryanin antuk sang ngamong karang ayahan inucap, sane mewasta gegaleng keluan, sejawaning tanah pecatu, tegal, carik utawi tanah padruweyan ngeraga, sane kapiara watese sisi klod miwah kauh ring punika mewasta gegaleng keteben.
- (3) Prade kerasayang pegahan/turus inucap ngelikadin, yan pada arsa penyandinge kengin watese ngangge pinget kewanten kesaksi antuk Prajuru desa utawi praciha pal saking BPN.
- (4) Prade wenten karang kebebeng mangda keutsayang wenten pemarginnya.

Pawos 23

- (1) Sinalih tunggil kerama desa banjar tan kalugra.
 ha. Ngalah alah margi, tegal ayahan desa karang desa;
 na. Ngalah alah tanah tegal kayangan setra lan sekancan tegal sinahgeh
 suci.
- (2) Prade wenten sekadi ring ajeng sang ngalah alah patut ngewaliang tanah
 inucap saha pamidanda sepatutnya kadulurin upakara ring pengalahlah
 tanah suci.

Kaping 2

P e p a y o n a n

Pawos 24

- (1) Ngawit nandur pepayonan tanem tuwuh patut adepa agung ngejeroang
 saking wates prade jantos ngaliwat wates wenang kasepat gantungin.
- (2) Taru/olih-olihan sane wenten pas ring wates kadruwe olih krama sane
 negen inucap.
- (3) Yening wenten pepuyonan ngungkulin semalihe mewastu mayanin kapisaga
 patut kewara antuk panguman ping ajeng prasada sang nuwenang wit
 ngerebah utawi notor.
- (4) Prade sampun kewara taler tan wenten usaha sang nuwenang wit sang
 rumasa keteteahan/kejerihan wenang mesadok ring Prajuru, tur risampun
 kaparitas kelugra ngicalang wit inucap.

(5) Sang keni pamidanda penyangaskara saha prebeya manut pirarem merep ring wewangunan sang kerubuhin luire :

ha. Sang nruwenang wit sinanggah mayanin, prade pungkak ngerubuhin wewangunan krama tios;

na. Sang notor, munggul utawi ngerebah taru tur ngerubuhin wewangunan krama tios.

(6) Krama Desa patut ngemanggehang kewedian tanem tuwuh sane ngawinang desane asri tur lestari.

Kaping 3

Wewangunan

Pawos 25

(1) Nyabran ngewangun patut :

ha. Mesadok ring prajuru ping ajeng prade wewangunan ngenenin wates.

na. Ngangge asta bhumi miwah gegulak kosala-kosali senistane manut petitis niskala.

ra. Tan dados ngembahang toyo kepisaga.

(2) Prade wewangunan jantos nyayubin bilih-bilih temboke ring telenging wates risampun kewara tur kesadokang ring prajuru wenang kedanda manut pirarem saha tembok inucap kagubar utawi senistane mangda kekaryanin abangan.

✓ (3) Yening wenten wewangunan nyanding kayangan patut kalugra antuk bendesa adat.

Kaping 4
Wewalungan
Pawos 26

- (1) Sehanan warga desa sane miara wewalungan (bawi risampun mebelas utawi banteng lan siosan punika sampun mesaluk tali) patut seyoga nitenin negul ngelogor mangda tan ngerusakin karang utawi pabyanan kerama sewos, bilih-bilih jantos ngeranjing ngeletehin kahyangan.
- (2) Prade wenten wewalungan melumbar utawi ngeleb ngerusakin karang pabianan krama sewos. Risampun keware kengin ketaban tur kedanda ngewaliang wit sane rusak saha nawur penebas papiaraan tatabanan manut pengelokikan Prajuru Desa.
- (3) Prade jantos ngeletehin tegak suci minakadi Pemerajan (Sanggah) Kemulan) risampun kaparitas antuk Prajuru wenang sang nruwenang kedanda mabuhu agung tehasan prascita durmangala utawi Panca Sata iwak behek belang kalung, prade jantos ngeletehin Khayangan Tiga utawi pura Pemaksan.
- (4) Krama Desa patut nyerayanin wewalungan miwah sarwa prani tan kepatut meboros paksi miwah nuba ulam lan siosan punika.

Kaping 5

Bhaya

Pawos 27

- (1) Para indikan bhaya luire : jiwa bhaya artha bhaya (kepandangan), geni bhaya, toya bhaya, ripu bhaya, duracara ring agama.
- (2) Sang manggihin kehanan panca bhaya patut nepak kulkul bulus mapitulung anut pawos 15 (2) aksara na.
- (3) Prade ring desa kehanan jiwa bhaya tur ngelechin desane, patut desane ngawentenang butha yadnya tur sang mayanin katur ring sang ngawe wenang.
- (4) Prade wenten jatma memisuh utawi nguman-nguman jadma tiros, kekenin pamidanda beya pecamil tehasan pemrasyita.

Pawos 28

- (1) Sang manggihin kahanan artha bhaya (kepandangan), patut ngulkul mapitulung anut ring pawos 15 (2) aksara na, utawi sang ketamilangan atur supeksa ring Prajuru/Dulun desa sane pacang nandanin saha mawuwuh penyanggaskara prade wenten jatma ngemaling barang sinanggeh suci.
- (2) Pratingkabe mapailon ring dusta kebawos ngukubin corah, utawi prade wenten jatma manggihin maling tan nyadokang ring Prajuru jantos jatma tiros nyaduang, patut kedanda kadi dandaning maling, sekueh pengargan

wit manut cacakan, tur prade jantos ping tiga melaksana asapunika wenang kasukserah ring sang ngawe wenang.

- (3) Prade wenten jatma ngerereh reramon, minakadi daun kelapa, ron, miwah sane tiosan tan pasadok ring sang nuwenang, prade kacanduk (ketara) patut kedanda kadi dandaning maling.
- (4) Yening wenten jatma ngeranjingin pakubon wiadin pekarangan rikala suwung tur tan pewangsit mewastu sang madruwe karang keicalan, wenang jadma inucap dados kesinangeh memaling saha madewa saksi ring Pura Desa/Bale Agung.
- (5) Mangda tan kasinangeh manut ring ajeng, asing-asing ngeranjingin kubon jadma sios patut :
 ha. Matenggeran suara (mekaukan)
 na. Nyantos sang nruwenang rawuh utawi mesadok ring pengapit pinih tampek, maka buatan pengeranjing.

Kaping 6

Penyanggran Banjar

Pawos 29

Krama Desa rikala ngawentenang karya suka-duka, patut kesangra antuk banjar manut pirarem.

CATHURTAS SARGAH
SUKERTA TATA AGAMA

Paket 1

Indik Dewa Yadnya

Pawos 30

- (1) Pelinggih Penyiwian Desa Adat Buwit luire :
 - ha. Kahyangan Tiga : Pura Desa Bale Agung, Puseh, Dalem
 - na. Pura Rare Angon
 - ca. Pura Melanting
 - ra. Beji Pura Desa
- (2) Rahinan piodalan soang-soang kahyangan inucap, kadi ring sor punika :
 - ha. Ring Kahyangan Tiga luire :
 1. Pura Desa/ Bale Agung/Puseh, rikala : Sukra Paing Dungulan
 2. Pura Dalem, rikala :
 - Pura Dalem Buwit rikala : Soma Umanis, wuku Toulu
 - Pura Dalem Kelakahan rikala : Saniscara Paing, Merakih
 - na. Pura Rare Angon rikala : Saniscara Keliwon, Uye.
- (3) Pengaci ring pura inucap manut kecap sastra agama, saha kelaksanayang
nista, madya, utama nganutin kawentenang lan pirarem.
- (4) Pengemong pengempon soang-soang Pura manut dresta miwah pirarem.

Pawos 31

- (1) Ring soang-soang Pura inucap kawentenang Pemangku
- (2) Ngadegang Pemangku manut dudonan
 - ha. Turunan utawi ngewaris;
 - na. Nyanjan[†] uawi nuwur, mapiteges mapinunas ring ajeng penataran pura;
 - ca. Kapilih, olih Krama Desa
- (3) Tan kewenang ngangge pemangku luire :
 - ha. Cedangga, luire peceng, perot, cungh lan sepenunggilan;
 - na. Sang sapasira ugi sane kapatutang anut perarem;
 - ca. Sakit ila, ayan, buduh, miwah sakit tan sida ketambanin;
 - ra. Sane madrebe parilaksana tan becik.
- (4) Prabea kepemangkuan :
 - ha. Ngewintenin pemangku kemedalin saha kelaksanayang antuk sang ngadegang, minakadi krama desa utawi pengempon pura soang-soang.
 - na. Mepitra Yadna riwekas prade kulawarga pemangku tan mresidayang, patut karomba antuk krama desa utawi pengemong, manut perarem.
- (5) Pemangku patut ngemanggehang sesana miwah agem-ageman pemangku.

Pawos 32

- (1) Swadarma pemangku luire :
 - ha. Ngenterang upacara piodalan ring Khayangan utawi ring soang-soang pekubon krama;

na. Tan wenang salab-sulub, yan memurug wenang pemangku inucap nyepuhin raga;

ca. Prade salah sinunggil pemangku kapiatang wiadin cuntaka, kengin nyelang pemangku kayangan tiga siosan utawi nuwur sang sulinggih.

ra. Semalih yan sampun pemangku ngayah tigang rahina ring Pura Kancit wenten kulawarga lina, pemangku inucap tan keneng cuntaka sakewanten pemangku tan budal selami piodalan kahyangan tiga.

(2) Petias utawi olih-olihan pemangku luire :

ha. Sarin canang lan upon pura manut pirarem.

na. Luput pekaryan lan luput pepeson ring kahyangan sane kaempon.

Pawos 33

(1) Pemangku kagentosin riantukan :

ha. Lina;

na. Pinunas ngerage, menawi kegeringan lan sepenunggalannya;

ca. Kawusan antuk krama menawi malaksana sane tan patut (asta dusta)

(2) Prade pemangku kasepekang sangkaning melaksana asta dusta, keni pamindanda manut pirarem.

Pawos 34

Kasukertaan Kahyangan ring Desa :

(1) Sane nenten kalugra ngranjing ka pura luire :

ha. Sang katiba cuntaka, minakadi sebel ngerage :

1. Sebel kandel, ngeraje sewala, selami dereng mebersih.
2. Sebel madruwe putra, sajeroning 42 rahina, kruron.
3. Sebel pengantenan, sadereng mabiakala.
4. Cuntaka sangkaning kepadaman manut senger.

na. Sang panten miwah anak babinjat sedereng maupakara;

ca. Makta sahaning sane kasinanggeh ngeletehin;

ra. Wewalungan suku pat, sejawaning ring kala mapepada;

ka. Mabusana sane tan manut sekadi tata caraning ngranjing ka Pura;

da. Anak alit sedereng mayusa tigang sasih;

ta. Sadereng polih wak-wakan (pituduh) prajuru desa Adat.

(2) Busana ngranjing ka pura wenang nganutin dresta minakadi :

ha. Ritatkala ngaturang ayah, mawastra lan nyclempot;

na. Ritatkala ngaturang sembah, mabusana jangkep;

ca. Siosin kadi ring ajeng nenten kalugra, sejawaning sampun pituduh prajuru.

(3) Parilaksana tan kawenangan ring pura, luire :

ha. Masuara sane kasinanggeh wak parusya, waka capala ;

na. Makoratan/mabacin, mawarih, masanggama;

ca. Masumpah utawi macoran, sajawaning pituduh prajuru desa;

- ra. Ngias raga sejawaning ngias pandita miwah pinandita, sajawaning kalugra prajuru;
- ka. Munggah tedun palinggih sejawaning pituduh prajuru desa.
- (4) sang mamurug kadi kecaping ring ajeng, keni pemianda pamerayascita sapatutnya.

Pawos 35

- (1) Yan wenten jatma karawuhan ring Pura, kengin patut katatasang, prade rumasa kesumangsayan, yan tan wiakti kerawuhan inucap kasisipang manut pirarem.
- (2) Prade Kahyangan kahanan durmanggala minakadi kapanca bhaya pemangku patut digelis nyadokang ring prajuru mangda marumang krama desa tur ngawentenang upacara sapatutnya.

Palet 2

Indik Rsi Yadnya

Pawos 36

- (1) Sang pacang madeg pandita utawi madwijati patut masadok ring Prajuru Desa kalih Parisadha Hindu Dharma.
- (2) Prajuru Desa patut nitenin naweng nagalengin prade wenten kacihnan lempas ring kekecap miwah dresta.
- (3) Sang dwijati polih leluputan ayahan lan papeson, manut ring pirarem.

Pawos 37

- (1) Sang sulinggih patut ngeriyinang ngayunin ring wewidangan desa adat Buwit. Sesampune wawu muputang yadnya ke jebar jagat utawi ke Dura Desa.
- (2) Krama Desa sami patut sareng nitenin ketuntun antuk Prajuru, mangda sehanan yadnya sane kawentenang kaicen pamuput olih Pandita.

Palet 3**Indik Pitra Yadnya****Pawos 38**

Dudonan pemargin pitra yadnya

- (1) Pengupakaran sang lina :

ha. Mendem utawi ngeseng, makacihna pekingsan ring Ibu Pertiwi utawi rin Bhetara Brahma, selami nuptupang prabeya.

na. Meupacara pengabenan/pelebon.

- (2) Upacara-upacara Pitra Yadnya riwusan keabenang mewastu raris memukur tur kelanturang ngalinggihang dewa pitara.

Pawos 39

Swadarmaning lan telegenan krama parde wenten sinalih tunggal warga lina :

- (1) Sang kadulikitaan patut :

ha. Nyadokang ring Bendesa Adat tur nunas tetimbang ring kawentennya;

na. Ngaturin Banjar ngerombo mekarya eteh-ete sawa kedulurin
penyembrama canang sesidan antuk.

(2) Swadarmaning Banjar/Desa :

ha Klian Banajr maritatas pemargin sang kaduhkitan, napike pacang
kependem, makingsan riyin utawi lantur keabenang;

na. Prade kapendem, raris kawentenang kulkul patahu manut pawos 15 (3)
aksara na. antuk Klian Banjar utawi wakilnya;

ca. Penyanggran Banjar selanturnya :

1. Soang-soang krama Banjar nedunang patas manut pirarem;
2. Ngaryanin eteh-ete sawa;
3. Sami krama Banjar ngater ke setra jantos pemendem pangabenan
puput;
4. Tan kengin ngelelet langkungan ring 7 (pitung) rahina, tur patut
polih gebagan anut paitungan Klian Banjar;
5. Tan kalugra nginepang bangbang lan pangesengan;
6. Tan kalugra nyekeh layon langkungan ring awarsa.

(3) Prade wenten lina, rikala piodalan ring pura, kengin mendem tan pasadok
tur memargi wengi, yening kalugra antuk prajuru.

(4) Pemargin pamendeman utawi palebonan mangda nganutin sastra agama lan
dresta.

Pawos 40

(1) Sane kasinanggeh kacuntaka sekadi ring sor :

ha. Cuntaka antuk antuk lina

na. Cuntaka ngeraje sewala

ca. Cuntaka antuk ngembasang putra

ra. Cuntaka antuk keruron

ka. Cuntaka antuk pawiwahan

da. Cuntaka antuk gamia gamana

ta. Cuntaka antuk salah timpal

sa. Cuntaka antuk yaning wenten ank istri mobot nenten keupakaran
pabiukawonan tur pawidiwidana.

wa. Cuntaka antuk mamitra ngalang

la. Yening cuntaka, raris wenten pepeson ring adat, pepeson punika
katawur ri sampun wusan cuntaka.

(2) Sengker cuntaka manut kewentenan :

ha. Cuntaka kelayu sekaran, cuntakannya kantos masesepuh manut dresta.

na. Cuntaka ngerajaswala, 3 rahina nagwit saking ngeraja swala utawi
selamaning ngeraja swala;

ca. Cuntaka ngembasang putra, 42 rahina (abulan pitung dina) ngawit
saking putrane embas, utawi ngantos sampun kaupakara
mekekambuhan tur meprascita manut sekadi agama lanang wiadin istri.

ra. Cuntaka keruron abulan pitung dina (42 rahina) tur sampun
meprayascita.

- ka. Cuntaka pawiwahan, cuntakanya ngantos sesampune meupakara makala-kalahan.
- da. Cuntaka gamia gamana cuntakania jantos sesampune kapalasang/masepihan tur sampun kawentenang pamerascita Desa Adat lan Kayangan.
- ta. Cuntaka salah timpal, kapuputang sekadi ring Agama Hindu tur dresta/adat.
- sa. Cuntaka anak istri mobot sangkaning lokika sanggraha nenten kewentenang upakara pabiokawonan, cuntakannya ngantos kewentenang upakara pebiokalan.
- wa. Cuntaka memitra ngalang, cuntakania ngantos kewentenang upacara pabiokaonan parascita.
- la. Ngembas, putra nenten kewentenang upakara pawidi widana, cuntakannya ngantos wenten sane memeras sang putra tur sampun kawentenang upakara sekadi ring ajaran Agama Hindu.

(3) Cuntaka kelayu sekaran kapademan :

ha. Kependem cuntakania :

1. Cuntaka sebel ke banjar rauhing 3 rahina riwusan mendem utawi sesampun polih prayascita (masesepuh).
2. keluarganya sajeroning pekarangan ngantos nganutin dresta

na. Ngaben cuntakanya :

Sang nyambut pitra yadnya cuntakania ngawit saking ngerancang karya rauh riwus yadnyanya (mepepegat).

(4) Tan keneng cuntaka luire :

ha. Sang sulinggih

na. Pemangku kahyangan tiga rikala piodalan.

Pawos 41

(1) Atiwa tiwa utawi pengabenan kamargiang medasar antuk sastra agama miwah dresta.

Palet 4

Pawos 42

Indik Setra/Tunon

(1) ha. Genah ngeseng/mendem sawa sane meagama Hindu ring Setra Desa Adat Buwit.

na. Sang pacang ngangen setra patut nunas kebebasan ring Bendesa Adat/Prajuru Adat.

ca. Wong Desa/Banjar patut nitenin mangdene sehanan letih setrane tan ngelalah utawi kebakta ke desa pekraman bilih-bilih kekayangan.

ra. Setra Buwit wantah dados mependem setra bebajangan wantah dados mependem, setra kelakahan dados mependem utawi ngeseng.

(2) Pidabdab mendem/ngeseng sawa kedulurin kadi ring sor :

ha. Tan dados mendem/ngeseng sawa luire kala gotongan, semut seduur, prewani, purnama, tilem, rerainan jagat, piodalan, ring kahyangan, larung pagelangan, gagak anungsung pati.

- na. Mekirim/ngelemengang toya/sawa, nyandung/ngepuanang toya/sawa mekajang toya/sawa.
- ca. Sawa wong rare sedurung meyusa 3 bulan tan ngitung larangan pendem ring setra bebajangan.
- ra. Yan wenten sawa lintangan ring adiri jaga mependem/ngeseng ring setra asiki pemarginya sareng-sareng patut sawa nampek setra memargi dumunan tur sane mapendem mapailen dumunan.
- ka. Jadma padem sakit ila, ulah pati, salah pati dados ngeranjing kepekubon lan kependem ring setra.
- da. Nyekeh sawa lintang ring 2 rahina lan sawa sane sakit menular patut kasuntik antuk formalin.
- ta. Gegumuk ring setra ri sampun masuwe 42 rahina yening ngelikadin dados kagubar.
- sa. Tan dados mendem/ngeseng sawa lianan ring setra yan wenten sane memurug ketiwakin Pamarisuda desa.
- wa. Sakancan sane ngranayang leteh wenten ring setra wenang kabersihin utawi kagenahan ring genah sane kasungkemin olih krama desa.

Palet 5

Indik Manusa Yadnya

Pawos 43

- (1) Manusa yadnya inggih punika upacara-upacara dharmaning kauripan manusia ngawit saking patemoning kama bang lan kama petak sejeroning garba ngantos kelayu sekaran.
- (2) Upacara kadi ring ajeng madudonan sekadi ring sor :
 - ha. Megedong-gedongan duk pengerempinian ibiang;
 - na. Duk sang rare medal;
 - ca. Kepus udel;
 - ra. Roras rahina;
 - ka. Tutug kambuhan (42 rahina);
 - da. Tigang sasihin (3 bulan);
 - ta. Pawetuan/oton odalan (6 bulan);
 - sa. Tutug kelih (ngeraja swala sane wadon ngerajesinga sane lanang);
 - wa. Metatah/mepandes;
 - la. Mawiwaha;
 - ma. Mawinten.
- (3) Upacara-upacara inucap kemargiang nista, madia utama manut sastra agama miwah dresta.

Palet 6

Indik Bhuta Yadnya

Pawos 44

- (1) Bhuta Yadnya inggih punika upacara-upacara merupa; byakala, caru, labaan aci lan pakelem miwah sane siosan.
- (2) Upacara pabyakala ring pertiwi, khayangan lan bebhutan kewastanin mecaru.
- (3) Pecaruan inucap ring ajeng nista, madia utama, manut wiguna kadi ring sor :

ha. Eka Sata	na. Panca Sata
ca. Panca Sanak	ra. Resi gana
ka. Panca Kelud	da. Tawur Agung
- (4) Sejawaning kadi ring ajeng kawentenang upacara :

ha. Mebanten utawi saiban wusan ngrateng
na. Mesapuh-sapuh rikala pacang wali ring pura.

Pawos 45

- (1) Nangken ngewarsa rikalaning Tilem Kesanga kewentenang Caru Kesanga. Kelanturang Ngerupuk makacihna pacang mapag rahina Penyepian benjangne.
- (2) Bratha Penyepian sane kemargiang antuk Krama Desa :

ha. Amati eni	: tan kengin meapi-api;
na. Amati karya	: tan kengin nyambut karya;

ca. Amati lelangunan : tan kengin maoneng-oneng, masuare gora, lan
sapanunggalannya;

ra. Amati lelungan : tan kengin malelungan merika-meriki.

- (3) Peberatan inueap kemargiang sakeng semeng ngantos ngedas lemah.
- (4) Sang mamurug kecaping ajeng tur kapastika iwang oleh pecalang Desa,
keni pamidandha, manut pebawos Sabha Desa.
- (5) Riwus rahina Nyepi (benjangne) maka cihna pengawit Icaka Warsa patut
soang-soang warga desa sami saling ngaksama (Dharma Santi).

PANCAMA SARGAH
SUKERTA TATA PAWONGAN

Palet 1

Indik Pawiwahan

Pawos 46

- (1) Pawiwahan inggih punika patemoning purusa predana, melarapan panunggalan kayun suka cita kaduluring upasaksi sekala-niskala.
- (2) Pemargin pawiwaha luire :
 - ha. Pepadikan, kemanggalaning antuk pekrunan;
 - na. Ngerorod, merangkat riyin wawu kekrunayang;
 - ca. Nyeburin utawi nyentana nyeburin risampun kemanggala antuk upacara pamerasan.
- (3) Pidabdab sang pacang mawiwaha patut :
 - ha. Sampun manggeh daha-teruna;
 - na. Sangkaning pada lila (tan paksa);
 - ca. Kemargiang sudi widani prade pengambilan tiros agama.
- (4) Pemargin pawiwahan mangda nganutin Undang-Undang Perkawinan saking Sang Ngawewenang.

Pawos 47

- (1) Pawiwahan sane kepatutang ring Desa sekadi ring sor :
 - ha. Sampun kemargiang pekalan-kalan utawi pesakapan kesakiyang oleh tri upasaksi inggih punika manusa saksi, bhuta saksi lan dewa saksi;

na. Prajuru patut mapakelingang utawi ngilikitayang pawiwahan ring register pawiwahan, keni prabeya nganut pirarem.

(2) Pawiwahan sane tan manut kadi ring ajeng sinaggeh tan pastika.

Pawos 48

Tata caraning parabian :

(1) Sapasira ugi pacang ngwarangang pakulawargan ya patut masadok ring prajeru, selanturnya prajuru mari talasang manut tan manut indik perabianne;

(2) Pemargin pepadikan anut dudonan;

ha. Pakrunan jantos ping 3 saha soang-soang melarapan

1. Kapertama antuk sedah woh

2. Kaping kalih antuk sedah who lan sajeng

3. Kaping tiga antuk tipat bantal kabawos pamuput pepadikan

na. Risampun puput pakraman raris sang istri keajak budal ring pakubon

sang lanang saha kalanturang antuk pabyakala;

ca. Mangda pragat tumus sekala niskala, raris kulawarga purusa makta

pejati ring merajan wadon.

(3) Prade ngerorod merangkat patut :

ha. Reraman lanange ngawentenang pengelukuan/pejati antuk duta saksi

paling kedik 2 (kalih) diri;

na. Genah antene tan kengin ring pakubon sang lanang sedereng

mabyakala.

(4) Sajeroning pakrunan pangelukatan patut :

- ha. Kamanggala antuk geng pengampura majeng ring rama rena wadone;
- na. Keigumang bawos indik idih pakidih utawi palegayang arep ring pasewakan sang ngidih saha dewasa pakerabkambeyane wekas;
- ca. Kacihnayang indik kapurus utawi prade sentana rejeg kejejerang kapatut ngidih ank lanang sane kabawos pawiwahan nyeburin tur risampun sulur pamerasan kategepin kemanggehang sentana nyeburin;
- ra. Prade tan terima pengelukuan pejati, tan katerima pakrunan kemargiyang jantos ping 3.

(5) Pkerabkambean mapiteges upacara-tinas apadang (puput) mapikuren dwaning sampun manut sekadi pahilenannya manut dresta.

Palet 2

Indik Nyapian

Pawos 49

- (1) Pawiwahan prasida kawusang melarapan antuk palas perabian utawi kepademan.
- (2) Wusan mapikuren riantukan salah sinunggil lina mapiteges balu, mekadi balu lanang/istri.
- (3) Palas perabian inggih punika sangkaning mawiwit wicara.
- (4) Sang ayat palas merabian patut atur supeksa palikitan riyin ring sangrumawos (Pengadilan Negari) wastu tinas apadang pamutuse kebawos nyapian, wawu prajuru dulu nyiarang kawentenannya ring desa adat.

Pawos 50

(1) Tata cara palas perabian sekadi ring sor :

- ha. Nawur prebeya pesaksi sinalih tunggi sami matenga;
- na. Pangunakayan polih pahan pada;
- ca. Pebekel, tadtadan soang-soang kekuasang niri-niri, sakewanten indik warisan kekuasang antuk purusa;
- ra. Ngawuruhin miwah ngupajiwan pratisentana manut swadamaning guru rupaka;
- ka. Nawur pamidanda penumbas kulkul manut pararem utawi manut dresta;
- da. Ngelung jinah bolong manut logika Prajuru/dulu utawi manut dresta;
- ta. Mepamit saking merajan sang purusa.

(2) Prade riwekas sang palas kecihna adung malih, patut :

- ha. Ngemargiang pawiwahan malih;
- ra. Kedanda nikel saking palase.

Pawos 51

(1) Sang balu kebinayang dados :

- ha. Balu luh wit sentana (sentana rajeg) miwah balu luh boya sentana;
- na. Balu muani kapurusa (wit sentana) kepurusa miwah balu muani nyeburin (boya sentana).

(2) Swadarmaning balu inucap patut :

ha. Ngemanggehang pati brata tan patut ngemargiang para dara/dratikrama;

na. Nguasayang waris guna kaya tan dados ngadol, ngadeang, makidihang

lan siosan punika, sajawaning kabebasanang saking pianak utawi

kaluarga pinih tampek saking rabine prade okane kantun alit-alit;

ca. Kengin ngidih sentana prade wenten kacumpuin antuk kaluarga
sinanggeh kapurusa;

ra. Kawenangan mawiwaha malih, prade wenten kebebasan saking warga
kepurusa.

(3) Balu kaucap tan pageh ring sor :

ha. Drati karama utawi para dara;

na. Matilar saking pakubon tan pasadok jantos 6 (nem) sasih;

ca. Lempas ring swadarma sewos-sewosan tan prasida ngesehin solah
maprawerti marep ring pituduh kulawarga purusa.

Palet 3

Indik Sentana

Pawos 52

(1) Sentana wenten kalih pawos, sane keucap pratisentana miwah sentana
pepersan.

(2) Pratisentana inggih punika sentana sane metu saking pawiwahan kepatut.

(3) Prade pawiwahan tan ngewetuang sentana kengin ngidih sentana antuk
upasaksi sekala-niskala sane kewastanin sentana peperasan.

Pawos 53

- (1) Ngamanggehang sentana manut dudonan patut makacihna arta berana pemerasan sane kesaksiang sekala-niskala.
- (2) Sapa sira ugi krama pacang ngidih sentana, patut mesadok ring Bendesa Adat senistane asasih sedereng pemerasan.
- (3) Bendesa Adat kewakilin antuk klian-klian banjar nyiarang ring sewidangan desa, sang sapa sira ugi rumasa tan lila mangda nguningang mesengker kalih wuku sedurung pemerasan, ring Bendesa Adat.
- (4) Prajuru/Dulu desa digelis mawosan saha ngicenin pemutus nepek ring catur dresta miwah perarem.
- (5) Prade sulur peperasan tan manut ring kecaping ajeng Prajuru/Dulu desa wenang, ngandeg sang pacang mekarya, saha ngicenin pemutus, mangda kapuputang riyin bebawosan sulur utawi wicaranya.

Pawos 54

- (1) Peperasan sane kepatut risampun makacihna :
 - ha. Widhi widana pemerasan;
 - na. Kesaksinin antuk prajuru desa sane makelingang utawi ngalekitayang;
 - ca. Kesiarang ring wewidangan desane.
- (2) Sane kepatut peras angge sentana kadi ring sor :
 - ha. Jadma meagama Hindu;
 - na. Kulawarga saking purusa, prade tan wenten kengin saking wadon yaning taler tan wenten wawu kengin sekama-kama (sekita kayun);

ca. Keutamayang saking waris pancer kapurusa;

ra. Sinalih tunggil mawiwit saking kulawarga tunggal sanggah utawi merajan, paibon lan dadia, utawi ngambil anak tios sakewanten sang meagama Hindu.

(3) Kengin ngangkat sentana langkung ring adiri, lanang wiadin wadon.

Palet 4

Indik Warisan

Pawos 55

(1) Warisan inggih punika arta berana saha ayah-ayahan ngupadi sukerta sekala-nisakala saking keluhurannya marep ring turunannya.

(2) I Kang sinanggeh warisan luire :

ha. Due tengah, mekadi tegal ayahan desa sanggah/merajan, pusaka lan sane siosan;

na. Pangunakayan, tadtadan/jiwa dana, hutang piutang.

(3) Wawu kengin kebawos warisan prade wenten :

ha. Sang ngewarisang;

na. Keturunan (ahli waris);

ca. Arta berana, tetegenan (ayah-ayah) makacihna warisan.

Pawos 56

(1) Ahli waris luire :

ha. Pratisentana purusa;

na. Pratisentana rajeg;

ca. Sentana peperasan lanang/wadon.

(2). Prade wenten sekadi ring ajeng kang sinanggeh ahli waris;

ha. Turunan purusa pernah ngunggahang mekadi rerama lanang pekak
selanturnya rerama misan mindon.

na. Turunan purusa pernah kesamping mekadi keponakan-keponakan
dimisan miwah keponakan dimindon.

(3) Swadarmaning ahli waris patut :

ha. Nerima saha nguwasayang tetamian pahan keluhurannya, mekadi
ngerempon sanggah/merajan, Pura saha pengupakaranya, miwah ayah-
ayahan pewaris;

na. Ngabenang pewaris saha ngelanturang upacara-upacara pitra yadnya;

ca. Naurin hutang-hutang pewaris manut pengelokika.

Pawos 57

Mungguwing waris kewaris ring Desa Adat Buwit.

(1) Risampun kelaksanayang Pitra Yadnya lan hutang-hutang pewaris buntas
ketawur, wawu warisan dados kepah.

- (2) Para ahli waris sami polih pahan sangkaning pagunakaya sajawaning karang tegal ayahan desa kaemong antuk ahli waris kang sinanggeh krama ngarep.
- (3) Sinalih tunggil ahli waris kengin tan polih pahan prade :
 ha. Nilar kawitan lan sesananing agama Hindu;
 na. Alpaka guru rupaka;
 ca. Sentana rajeg kesah mawiwaha utawi pretisentana nyeburin soang-soang kebawos ninggal kedaton.
- (4) Boya ahli waris kengin muponin hasil anut dudonan luire :
 ha. Sentana luh, selama durung kesah mawiwaha;
 na. Balu luh wiadin muani nyeburin soang-soang boya sentana.
- (5) Pewaris kengin meweweh rikala meurip pinaka jiwa dana tedtadan/bekel make cihna peweweh tetap ring oka sane kesah mawiwaha.

Pawos 58

- (1) Prade sejeroning pakulawargan wenten ahli waris langkungan ring adiri patut :
 ha. Kawentenang paigum indik pedum waris inucap;
 na. Yan tan prasida ketunasang tetimbang ring Prajuru/Dulu-dulu;
 ca. Prade taler tan wenten tumpu ring penepas Prajuru, patut kadauhang ring Kertha Desa, prade taler tan kecumpuin, kengin ketunasang ring Sang Rumawos (Pengadilan Negeri).

(2) Prade karang inucap keputungan, patut Prajuru Dulu-dulu nibakang ring :

ha. Sang sinanggeh ahli waris manut pawos 56;

na. Sang kengin anggen sentana anut pawos 54;

ca. Prade taler tan wenten cumpu ring penepas kerta Desa, kengin,
ketunasang ring sang Rumawos (Pengadilan Negeri).

(3) Prade jantos karang desa kepah utawi kesepih, patut sang-soang medunin
mekrame desa ngarep.

Palet 5

Sima Krama Suka Duka

Pawos 59

Sima Krama Suka

(1) Sima Krama Suka,

ha. Yan wenten Krama Desa Adat ngewangun karya, sahanan kasinanggeh
suka, tur nunas pakaryan Krama Banjar dados ngwales bebaktaan;

na. Yan nenten nunas pakaryan krama Banjar nenten dados ngwales
bebaktaan.

Pawos 60

Sima Krama Duka

(2) Sima Krama Duka,

ha. Yan Wenten Krama Desa Adat ngawangun karya sahanan kasinanggeh
duka, nunas wiadin nenten nunas pakaryan krama banjar nenten dodas
ngawales babaktaan.

SAT SARGAH
WICARA LAN PAMIDANDHA

Palet 1

Indik Wicara

Pawos 61

(1) Sane wenang mawosin mekadi mutusang wicara ring desa inggih punika
Prajuru desa lan Sabha desa.

ha. Kelihan Banjar, pradene sang mawicara sane patunggilin banjar;

na. Bendesa Adat, sang mawicara sami-sami ring patunggalan Desa Adat.

(2) Tata dudonan mawosin saha muputang wicara warga desa kadi ring sor :

na. Kaping ajeng kabawosin antuk Kelihan Banjar;

na. Tan cumpu ring panepas kelihan banjar katunasang ring penglingsir
banjar;

ca. Pelingsir Banjar Kerta Banjar tan kacumpuin katedunang ring paruman
banjar;

ra. Paruman banjar tan kanutin kengin nunasang ring Bendesa Adat;

ka. Bendesa Adat tan prasida muputang katincepang ring penglingsir
sianggeh Sabha Desa;

da. Prade taler pamatut penglingsir desa tan kacumponin katunasang ring
paruman desa, sinanggeh wasananing pemutus ring desa.

Pawos 62

- (1) Sahanan wicara mewiwit kecorahan saka luire sinanggeh nungkasin daging awig-awig, pesuaran miwah pirarem Desa/Banjar, Prajuru/DuluDesa patut digelis mawosin tan nyantos pesadok.
- (2) Sejaba wicara kadi ajeng patut nyantosang pesadok sang nunas bawos.
- (3) Penepase patut pastika nyantenang iwang patut melarapan Tri Premana (saksi, lekita, bukti) miwah tan maren nepek ring Catur Dresta.

Palet 2

Indik Pamidanda

Pawos 63

- (1) Desa/Banjar wenang niwakang pamidanda ring warga Desa/Banjar sane sisip.
- (2) Peniwak inucap kemargiang olih bendesa Adat/Klian Banjar.
- (3) Bacakan pamidanda luire.
 - ha. Ayahan penukun kesisipan;
 - ra. Danda arta (dosa, danda saha panikel-nikelnya miwah panikel-nikel urunan);
 - ca. Rarampagan;
 - ra. Kasepe kang;
 - ka. Kewusang mekrame kewaliang pipilnyane;
 - da. Penyanggaskara.

- (4) Pamidanda sane katiwakang patut mesor singgih manut ring kesisipane utamanya ngemanggehang kesudamalan Desa.
- (5) Jinali utawi raja brana pamidanda, ngeranjing dados druwe Desa/Banjar.

Pawos 64

- (1) Krama sane langkung ring tigang paruman ngelantur tan nawur urunan miwah dedendan wenang kerampag.
- (2) Rarancangan ngangge tata cara kadi ring sor :
- ha. Kelaksanayang antuk prajuru kesarengin antuk Krama Desane seakehe tigang diri maka saksi;
- na. Sang ngerampag saking darsana ngambil barang utawi nyawenin tanem tuwuh, akehnya manut ring hutang sang kerampag;
- ea. Prajuru miteketang mangda barang-barang sane kerampag digelis ketebus mesengker awuku ring rahina pacang keadol;
- ra. Tan nganinin saluwir barang sane patut inggilang manut agama miwah mademang pengupa jiwa sang kerampag.
- (1) Prade sang pacang kerampag ngewara (ngalangin) pemargin inucap mewastu sampun tan nganutin awig-awig desa, wenang kesepakang.
- (2) Semalih yan purun taler ngalangin pelaksanaan kadi ajeng makudang kudang pesangkepan kaicen patinget tan wenten pemargi sejawaning kewaliang pipil nyane (kauwusang makrame).

(3) Pamidanda inucap ring ajeng mewasta puput risampun sang kekeninin :

ha. Nunas geng pengampura ring krama desa banjar riantukan piwal pasuba

pirarem (pecak);

na. Nawur pengargan penguwak pasubaya duk pacang kerampag kedulurin

parayascita.

SAPTAMA SARGAH
NGUWAH-NGUWUHIN AWIG-AWIG

Pawos 65

- (1) Nguwah-nguwuhin Awig-awig Desa Adat puniki kemargiang antuk paruman Desa.
- (2) Paruman inucap mangda kadasarin antuk pekarsan krama desa adat yadiastun kemedalang antuk prajuru sinunggal wiadin sinarengan.

Pawos 66

- (1) Sakeluiring sane wenten sederengnya patut keanutang ring sedaging Awig-awig puniki.
- (2) Sakaluiring sane durung kebawos sejeroning. Awig-awig puniki patut kemargiang manut tata cara sane sampun ketah memargi kadulurin antuk perarem-perarem.

ASTAMA SARGAH

SAMAPTA

Pawos 67

- (1) Awig-awig puniki kewastanin awig-awig Desa Adat Buwit.
- (2) Awi-awig puniki kamargiang ngawit keingkupin utawi keraremin.

Pawos 68

- (1) Awig-awig puniki kasungkemin ring paruman duk rahina Redite penanggal pang 3 Sasih Karo icaka, warsa 1924 tanggal 11 masehi Agustus ring 2002.
- (2) Awig-awig puniki kelingga tanganin antuk bendesa, kesarengin Klian-Klian Banjar/Tempek saha kesaksinin antuk Kepala Dusun/Lingkungan miwah Kepala Desa/Lurah sewewidangan Desa. Saha kakukuhang antuk Bupati Tabanan.

***** P U P U T *****

PAMIKUKUH


Prajuru Adat :

1. Kelihan Adat
Banjar Kelakahan Kaja

(I. WENGAH WARDHI)


4. Kelihan Adat
Banjar Buwit Kaja


(I. WAYAN SUKARTANA)


2. Kelihan Adat
Banjar Kelakahan Gede

(I. KETUT SUMERTA)

5. Kelihan Adat
Banjar Buwit Tengah

(I. NEDYANI SUR A.)

3. Kelihan Adat
Banjar Delod Sema

(I. NEDYANI JENSKI)

6. Kelihan Adat
Banjar Mertasari

(I. WENGAH KEBI..)

7. Bendesa Adat Buwit

(I. IST. A. NGR. A. ANANDHA)

Prajuru Dinas

Kepala Dusun Kelakahan
KEC. KEDIRI
(I Nyoman Suwandi)

Kepala Dusun Delod Sema
KEC. KEDIRI
(I Ketut Sudana)

Kepala Dusun Buwit
KEC. KEDIRI
(I Wayan Pugeh)

Kepala Desa Buwit
KEPALA DESA
BUWIT
(I Nyoman Dela Darmesta)

Bupati Tabanan

()